

միամիտ ոչխարը եւ հովերի թեւերի վրայ շա-
չելով իջնում է վիրաւորուած Յիսուսը:

Այստեղ է բանալին ամենայն բանի:

Իսկ, տես որ —

Մեզ հետ եկած ճարտարագէտը մօտենում
է քարերին, դնում, եւ ձեռքին բռնած մուրճի
հարուածով, փրցնում մի կտոր, բացատրում,
գիտական անուններ տալիս եւ գրպանը դնում:

Սեղծ այս մարմնի առջեւ կանգնել է ան-
յաղ տչքերով եւ ծախելու ապրանք է փնտ-
ռում:

Իսկ, տես որ —

Ծերունի ճարտարապետ ահագեմականը
ինձ հետ Պալլադիօի մասին է խօսում: «Ի՞նչ
լաւ բան կը լինէր, ասում է, թարգմանել նրա
գրուածքները ճարտարապետութեան մասին»:

Ու տես որ —

Ընկեր կոմիսարը, մատը դէպի հեռուն
ցցած խօսում է նաւային երթեւեկութեան մա-
սին: Նոր Բայազետում կարագի փութը 6
ուրբի է, քաղաքում ճիշդ կրկինը, — ճի՛շդ
կրկինը, — ու աչքերից բենդինի հոտ է գալիս,
ու սրտի մէջ փոքրիկ մօթօրը սիրահարուած
տրոփում է, մինչ ուղեղը թուաբանական թի-
ւերի պտուտակի հետ հեռաւոր ջրաղացներ է
դարձնում:

* * *

Վերադառնում ենք ափը: Նաւակը դեռ չի
եկել:

Սեւանայ նախկին թանգարանը փակ է:
Կղզին անցել է Լուսժողկոմատին եւ ամէն բան
տակնուվրայ է:

Կան երկու վարդապետներ:

Մէկը, աւելի հասակաւոր, ման է դալիս
թանգարանին կից պատշգամի վրայ, իսկ միւ-
սը՝ առոյգ, բարձրահասակ մի երիտասարդ
արեղայ՝ դէպի ծովը նայող ուրիշ մի պատըշ-
գամի տակ:

Հասակաւոր վանականը նայում է մեզ աչ-
քի տակից, կասկածանքով: Բարեւում եմ,
մօտենում եմ: Միավանկ պատասխաններ է
տալիս:

— Վարի եկեղեցին ե՞րբ շինուած է, Հայր
Սուրբ:

— Կը լինի 500 տարի:

— Վերի եկեղեցին ե՞րբ շինուած է, Հայր
Սուրբ:

— Կը լինի 500 տարի:

— Իսկ է՛ն վերինը:

Մտածում է:

— Կը լինի 500 տարի:

— Թանգարանը կարելի՞ է տեսնել:

— Մեր ձեռքից առին:

— Գրադարանը, ուր Գիւտ Սրբազանը...

— Յրիւ են տուել:

Լռութիւն: Էլ չգիտեմ՝ ի՞նչ ասել:

— Վարդապե՛տ, այստեղ լաւ ձուկեր կան,
չէ՞...

— Կային:

— Փախա՞ն:

— Արգիլեցին:

— Ինչպէ՞ս թէ արգիլեցին:

— Ահա մի տարի է ձուկի երեսը տեսած
չունենք: Մեզ արգիլել են ձուկ բռնել:

Քիչ յետոյ մօտենում եմ երիտասարդ ա-
րեղային: Ջղայնացած քայլում է: Անհանդիստ
նայուածքով, փայլուն աչքեր ունի: Համա-
կըրելի բամբ ձայն, տխուր եւ ըմբոստ շեշ-
տով:

— Երկու հոգի ենք, ասում է, եւ մէկ մէկի
հետ չենք խօսում: Սեղծ եւ անտանելի մարդ
է: Ամէն ինչ քանդուել է այստեղ. այդ մենա-
կութիւնը դարհուրելի է:

— Ի՞նչ էք անում այստեղ. անվերջ աղօ-
թո՞ւմ էք:

— Էլ սիրտ չմնաց՝ է՞նքան աղօթեցի:

— Ուռումնասիրո՞ւմ էք... ձեռագիրներ...

— Ամէն ինչ փակել են: Եւ ո՞վ է հիմա հե-
տաքրքրում այդ բաներով: Չէ՞ք տեսնում:

Քայլում է: Կոպերը ծածկում է եւ ծանր
մի տրտմութիւն սեղմում:

— Տուն նամակ եմ գրել, ուզում եմ վե-
րադառնալ: Եօթը տարի է այստեղ եմ: Եկայ
ուղևորուած, Սեւանայ կղզու հրապոյրը
կործքիս սեղմելու համար... էլ չեմ կարող,
ուզում եմ գնալ...

— Ո՞ւր:

— Տուն: Թիֆլիս: Տուն նամակ եմ գրել:

— Լաւ, տանը ի՞նչ պիտի անէք:

Արեղան կանգ առաւ, ձեռքերը կրծքին
տարաւ ու բիշ բիշ նայեց: Նայեց պարապին: